

XAKEA

Anand-Kasparov
parra egin zuten
15. partidan

NEW YORK

Munduko txapelduna den Gari Kasparov errusiarrak eta Viswanathan Anand indiarak parra egin zuten herenegun jokaturako hamabosgarren partidari. Hamasei mugimendu baino ez zituen izan atzoko neurketak eta biak ados jarri ziren parran geratzeko. Markagailua orain 9-6 geratu da eta Kasparov tituluari eusteko moduan da, hamarna egin gero ere berak jarraituko bailuke txapeldun modura. Anand indiarra badirudi etsirik dagoela, eta ahalik eta azkarren amaitzeko gogoz.

Beste bost partida falta direla, Kasparovi nahikoa zaio beste puntu bat lortzea. Hamaseigarren partida atzo gauean jokatu zuten eta, nahiz eta emaitza zein izan zen ez jakin, esan beharra dago Kasparov zuriakin jokatu zuela eta, beraz, ziurrenik beste puntu erdi bat lortuko zuela. Munduko txapeldun berriarentzat milioi bat dolarreko saria izango da eta txapeldunordearentzat milioi erdia. Kasparov irabazten badu, onena dela erakutsiko die Anand hobe dela esaten dutenei.

TENISA

Steffi Grafi
galdeketa egin
diote fiskalek

DONOSTIA

Mannheingo fiskalek galdeketa egin zioten Steffi Graf tenislari alemaniarri, ustez bere aitarekin batera iruzur egin diolako Alemaniako Haziendari. Bere aita den Peter Graf eta bere diru kontuez arduratzen zen Joachim Eckhardt kartzelan daude jadanik. Alemaniako SDR irraitak esandakoaren arabera, herenegun Steffi Graf fiskalaren aurrean izan zen bere abokatuarekin batera, eta galdeketa saioak egun osoa iraun zuen. Irrati horren arabera, Steffi Graf ez zuen inolako eragozpenik jarri deklaratzeko, eta dirudienez fiskalak ez du oraingoz inolako zantzurik aurkitu Steffi atxilotzeko.

HERRI KIROLAK

Angel Arrospide

AIZKOLARIA

■ Angel Arrospidek 39 urte ditu eta azken bost urteotan berak eskuratu du Euskal Herriko Aizkolari Txapelketa. Txapelketako errekorra ere berea du. Aurten arazoak izan dituen arren, faboritoa da biharko. ■

«Txapelari gustua hartzen zaio»

Txapeldunak bihar Olasagastik abantaila hartzeari dio beldur gehien

PERU C. SABAN / DONOSTIA

1,80 metro luze den eta 95 kilo inguru pisatzen duen leaburutar honen bihotzak atsedenean 40 taupada egiten ditu minutuko. Faborito nagusia berak behar luke izan, baina uda honetan apendizitisa osatzeko egin dioten ebakuntza dela-eta, ez du aurreko maila bera eman eta Olasagastik eta Larretxeak aurre hartu diote zenbait pronostikotan.

EGUNKARIA.— Txapela lortzeko asmoz aurten ere?

ANGEL ARROSPIDE.— Intentzioa bai, baina besteak oso fuerte zeudek eta zaila izango da.

EGUNKARIA.— Uda honetan izandako ebakuntza eta gero errekupeatu zara erabat?

ARROSPIDE.— Bai, huraz geroztik nahi eta ezin ibili nintzen bolada batean, baina iragan da eta nahiko gustora nago orain na- goen bezala.

EGUNKARIA.— Baina, agian, beste urteetan bezain argi ez duzu edukiko irabazteko.

ARROSPIDE.— Ez, ez, sekulan ez duk izaten argi irabazteko, batek irabazten dik eta... baina udan Larretxea eta Olasagasti oso fuerte ibili dituk, oso forma onean daude. Ni ere ondo negok baina oso estua izango da lehia- keta.

EGUNKARIA.— Olasagasti eta Larretxearen artean zein ikusten duzu fuerteen?

ARROSPIDE.— Nik Olasagasti.


EGUNKARIA.— Eta oraingo honetan buruak ondo erantzungo al dio Olasagastiri txapelketa nagusiaren aurrean?

ARROSPIDE.— Hobe, hobe huts egiten badu. Nik uste dut gakoa zera dela: bera oso arriskutsua da pixkanaka-pixkanaka aurre hartzen badigu, hortxe minutu erdi bat edo, abantaila hartzen badigu oso-oso arriskutsua da. Saiatu behar gara berak denbora hori ez hartzen. Denbora hori ez badu hartzen bera ere estu ariko dela iruditzen zait. Gakoa hor egongo da.

EGUNKARIA.— Prestakuntza berezirik egin duzu txapelketa- rako?

ARROSPIDE.— Nahiko presaka ibili gara. Esfortzu handirik ez dut egin, nahiko xuabe aritzen saiatu naiz. Gipuzkoako txapelketa ere utzi egin nuen eta gauzak xuabe egiten, nahiko ondo etorri naiz, baina azkenean presaka.

EGUNKARIA.— Ez duzu, beraz,



Arrospide azken bost urteetan txapeldun izan da.

LEIRE ARZUAGA

Finala Donezteben

P. C. S. / DONOSTIA

■ Euskal Herriko Aizkolari Txapelketako finalerako dena dago prest. Doneztebeko Bearzana pilotalekuan lehia bizia jokatu dute bihar eguerdian sei aizkolarik txapela lortzeko asmotan. Azken bost urteotan txapeldun izan den Arrospidek etsai gogorragoak izango ditu aurten, Olasagastik eta Larretxeak txapelketan beti bigarren izateari utzi nahi baitiote behingoz. Mindegia eta Nazabal gaztea ezustekoa ematen saiatuko dira, baita Peñagarikano ere. Hamabi pago enbor moztu beharko dituzte.

Indurainek bezala denborarekin hartu eta ondo-ondo prestatu txapelketa?

ARROSPIDE.— Denbora, nahi bai nik denbora, baina data jarrita zegoen eta... Baina bai, ondo prestatu dugu txapelketa. Donostian Urrezko Kopan ikusi genuen oso baxu nengoela eta asko neukala errekupeatzeko, eta denboratxo bat hartu behar izan genuen errekupeaziorako.

EGUNKARIA.— Eta uste duzu Donostiakoaz geroztik errekupeatu duzula lehengo sasoi?

ARROSPIDE.— Bai, bai. Kopatik kanporaketara hobetu egin nian eta eliminatoriatik hona ere de- xente hobetu dudala iruditzen zait.

EGUNKARIA.— Aurten finalean ia iazko berberak zaudete, ezta?

ARROSPIDE.— Bai, bat kenduta:

iaz Erasun izan zen eta aurten Peñagarikano, baina ez dakit nola ibiliko den Peñagarikano, ez baitu oraindik eskarmentu handirik finaletan. Beretzat arrakasta handia izango litzake azkena ez izatea.

EGUNKARIA.— Azken bost urteotako txapela berritzeko asmoz, ezta?

ARROSPIDE.— Bai, Mindegia bederatzi egin zizkian segidan eta ni seigarrenaren bila aterako naiz; txapelari gustua hartzen zaio.

EGUNKARIA.— Materiala nola- koa nahi duzu iganderako?

ARROSPIDE.— Beno, aurten Larretxea da materiala eramateko arduraduna eta espero dezagun normala izatea. Gogorra ala bi- guina? Gogorra bada izan dadila gogorra denentzat.

LABURREA

SASKIBALOIA:

Patronato
Ferrolen aurka

EBA ligako Bilbao Patronato taldeak gaur arratsaldeko 19.30etan jokatu du Galiziako Clesa Ferrol taldearen aurka. Bilboko taldeak hasiera bikaina emandio aurten denboraldiari, jokaturako bi partidua irabazi ditu eta sailkapeneko lehen postuan dago Breogama eta Vino de Toro taldeekin 7batera. ●

MOTORRAK:

Katalunya Sari-
ko denbora onenak

Kataluniako Sari Nagusiko entrenamenduen ondoren hauek izan dira denbora onenak. 125eko proban, Haruchika Aoki japoniarra izan zen onena 1.54.832eko denborarekin. Ondoren Sakata eta Raudies sailkatu ziren. 250ekoan, berriz, Tetsuya Harada izan zen azkarrena 1.50.008ko denboraz Biaggi italiarrak eta Oliver Jaque frantziarrak baino denbora hobe eginak. Azkenik, 500ekoan, Alex Criville izan zen azkarrena 1.47.646ko denborarekin. Bere atzetik, Doohan eta Cadelora sailkatu ziren. ●

EUSKADIKO lau
t'erdiko lehen
txapelketa

Aurten Euskadiko Pilota Federazioak antolatuko du lehen aldiz lau t'erdiko txapelketa. Hilaren 14an hasiko den txapelketan maila handiko pilotariak izango dira, besteak beste, Eugi, Beloki, Titin III, Retegi II eta Arretxe bera. Iaz Espainiako federazioak antolatu zuen txapelketa hau eta orduan Eugi izan zen onena. ●

BARCELONA ia
aurrelaririk gabe
ariko da gaur
Betisen aurka

Johan Cruyffen Barcelona futbol taldea ia aurrelaririk gabe geratu da, Meho Kodro bosniarra ere lesionatu egin delako, hilabeterako, zuntz haustura dela medio. Jordi Cruyff eta Angel Cuellar ere lesionatuta daude. Berez erdilaria den baina aurrean den Figo da Barça lehen plantilako aurrelari bakarra Betisen aurkako partidurako (21.00, ETB-1). ●